

Messadi pertuccont il relasch dalla lescha davart la protecziun dalla populaziun dalla vischnaunca Ilanz/Glion

Preziau signur president dil parlament
Stimadas parlamentarias, stimai parlamentararis

Alla vischnaunca manca entochen ussa la basa legala che reglescha las cumpetenzas per la protecziun dalla populaziun en situaziuns d'urgenza. Per quei motiv presenta la suprastanza communal al parlament communal sequentamein in messadi ed il sboz per l'introducziun dalla lescha davart la protecziun dalla populaziun.

Situaziun da partenza

Il sboz dalla lescha ch'ei avon maun sebasia sin la lescha davart la protecziun dalla populaziun dil cantun Grischun (LPP; DG 630.000). La legislaziun cantunala reglescha las cumpetenzas ed incumbensas dallas vischnauncas, dil cantun sco era da singuls partenaris dalla protecziun dalla populaziun tier la prevenziun per situaziuns specialas ed extraordinarias ed il dar damogn da talas sco era la finanziaziun dallas expensas corrispudentas. En situaziuns specialas ed extraordinarias han las vischnauncas tenor art. 11 e 15 oravontut las suandontas incumbensas e cumpetenzas:

- convocar il stab directiv communal;
- giudicar la situaziun;
- ordinar e realisar mesiras per proteger, salvar e tgirar la populaziun ch'ei adattadas agl eveniment;
- far e segirar las colligiazion da communicaziun cun ils partenaris dalla protecziun dalla populaziun e cun il stab directiv cantunala;
- organisar il provediment dalla populaziun cun victualias da basa, aua ed energia;
- organisar mesiras per restabilir la situaziun normala.

Plinavon vegnan las vischnauncas supplicadas da gidar e sustener ina l'autra sco era da metter a disposiziun gratuitamein al cantun ils locals, ils edificis ni ils beins immobiliars ch'ei necessari per applicar ils mieds d'agid dumandai.

Sebasond sin quei reglescha la lescha communal la preparaziun, l'ordinaziun e la realisaziun da mesiras en situaziuns specialas ed extraordinarias e precisescha las cumpetenzas e la finanziaziun.

Il survetsch giuridic dil departament per giustia, segirtad e sanadad dil cantun Grischun ha controllau il sboz dalla lescha sin artechels che savessen star en cuntradiciun cun il dretg cantunala (DG 630.000, LPP) ni il dretg federal (DF 520.1). Ord vesta giuridica eis ei vegniu communicau che la lescha davart la protecziun dalla populaziun dalla vischnaunca Ilanz/Glion harmoniseschi cun la legislaziun dil dretg cantunala e federal. Ultra da quei ha il menader protecziun dalla populaziun/survetschs e vicemenader digl uffeci da militar e protecziun civila dil cantun Grischun verificau il sboz dalla lescha tenor ils aspects dil fatg ni organisatorics.

Explicaziuns

art. 5–12 Stab directiv communal (SDC)

Art. 5 dalla lescha cantunala davart la protecziun dalla populaziun incumbensescha las vischnauncas d'engaschar in stab directiv per dar damogn a situaziuns specialas ed extraordinarias, da descriver sias cumpetenzas ed incumbensas sco era da procurar per la scolaziun dallas commembras e dils commembers. Leutier porscha il cantun scolaziuns corrispudentas.

La cumposiziun dil SDC vegn reglada dalla suprastonza communal ell'ordinaziun. Tenor sboz duein las suandontas funcziuns formar il SDC:

- a. president communal;
- b. vicepresident communal;
- c. menader canzlia;
- d. menader planisaziun e construcziun;
- e. menader menaschis technics;
- f. cumandant da pumpiers;
- g. cusseglader local per prighels dalla natira (CLPN);
- h. representant polizia communal.

art. 13 Finanziaziun

Tenor art. 24 dalla lescha davart la protecziun dalla populaziun el cantun Grischun han las vischnauncas da pagar ils cuosts:

- che seresultan d'acziuns per prevegnir e dumignar situaziuns specialas ed extraordinarias, sche quels cuosts san buca vegnir adossai allas caschunadras ed als caschunaders;
- per ils apparats che vegnan duvrai per menar e mantener la communicaziun cun il cantun ed ils ulteriurs partenaris dalla protecziun dalla populaziun;
- per igl agid tschercau tier vischnauncas vischinas, tier il cantun ni tiarzs;
- che seresultan en lur sectur muort ordinaziuns dalla confederaziun.

Tenor igl art. 35 lit. a dalla constituziun communal ei il parlament communal responsabels per il relasch da leschas. Il referendum facultativ resta resalvaus tenor art. 32 al. 1 lit. a.

Proposta

Sin fundament dallas explicaziuns precedentas fa la suprastonza communal las suandontas propostas al parlament communal:

- d'entrar ella fatschenta;
- d'approbar la lescha davart la protecziun dalla populaziun.